

Buletin

e-ISSN: 2600-8289

ACIS

Syaaban - Ramadhan 1444/ Mac 2023



Ramadhan : Bulan Al-Quran

Madrasah Sufi
dalam Ramadhan **4**

Ramadhan Bukan Bulan
Pesta Makanan **11**

Jaga Lidah Supaya
Pahala Puasa Tidak
Berkurangan **10**

Maqasid Ramadhan:
Hikmah Pensyariatan **7**

Nota Kaki:
Syarat-syarat, Rukun dan Perkara
yang Membatalkan Puasa **8**

eISSN 2600-8289



Ramadan: Bulan Al-Quran



Oleh:

Nasif Sidquee Pauzi

Pensyarah Kanan Akademi Pengajian Islam Kontemporari (ACIS), UiTM Cawangan Negeri Sembilan, Kampus Seremban

Setiap kali tibanya Ramadan, umat Islam bergembira menyambutnya dengan pelbagai ibadah. Ramadan adalah bulan ibadah. Di dalamnya terkandung pelbagai ibadah yang dianjurkan umat Islam melaksanakannya seperti solat tarawih, sedekah, berzikir, berselawat dan pelbagai lagi ibadah lain. Namun fokus utama Ramadan adalah puasa dan juga tilawah al-Quran. Hal ini kerana pada bulan inilah al-Quran diturunkan oleh Allah Taala kepada Nabi Muhammad SAW.

Al-Quran adalah firman (kalam) Allah yang merupakan mukjizat, diturunkan kepada Nabi Muhammad SAW dengan perantaraan malaikat Jibril AS, disampaikan kepada kita secara mutawatir dan membacanya dikira sebagai ibadah khusus. Al-Quran turun kepada Nabi Muhammad SAW selama tempoh 23 tahun dan ianya menjadi sumber rujukan utama seluruh umat Islam.

Penurunan al-Quran bermula pada tahun 610 Masihi semasa Rasulullah SAW berumur 40 tahun. Pada ketika itu baginda berada di Gua Hira' semasa malaikat Jibril AS muncul dan memerintahkan baginda membaca ayat pertama hingga kelima daripada surah al-'Alaq. Allah berfirman maksudnya, "*Bacalah (wahai Muhammad) dengan nama tuhanmu yang menciptakan (sekalian makhluk). Ia menciptakan manusia dari sebuku darah beku. Bacalah, dan Tuhanmu yang Maha Pemurah. Yang mengajar manusia melalui pena dan tulisan. Ia mengajarkan manusia apa yang tidak diketahuinya.*" (al-'Alaq 96: 1-5)

Penurunan ini berterusan selama 23 tahun selama hayat Nabi SAW sehinggalah baginda SAW wafat pada tahun 632 Masihi. Terdapat dua pandangan ulama dalam membicarakan tentang persoalan penurunan al-Quran, pandangan pertama menyatakan bahawa penurunan al-Quran itu berlaku dalam tiga fasa, manakala pandangan kedua menyatakan penurunan al-Quran berlaku dalam dua fasa.

Tiga fasa menurut pandangan yang pertama adalah:

1. Al-Quran turun ke Lauh Mahfuz
2. Seterusnya turun ke Bait al-'Izzah di langit dunia
3. Seterusnya turun kepada Nabi Muhammad SAW.

Manakala, pandangan yang menyatakan al-Quran turun dalam dua fasa berpendapat, al-Quran terus turun ke Bait al-'Izzah di langit dunia seterusnya turun kepada Nabi Muhammad SAW di Gua Hira, Mekah. Pendapat kedua adalah pendapat yang masyhur menurut ulama dan ianya disebut oleh Saidina Abdullah bin Abbas RA. Pendapat yang menyatakan penurunan al-Quran berlaku dalam tiga peringkat menghuraikan:

Penurunan **Peringkat Pertama**: Turunnya keseluruhan al-Quran sekaligus ke Lauh Mahfuz pada waktu dan cara yang hanya Allah SWT sahaja yang mengetahuinya. Ini berdasarkan firman Allah bermaksud, "*(Sebenarnya apa yang engkau sampaikan kepada mereka bukanlah syair atau sihir), bahkan ia*

adalah al-Quran yang tertinggi kemuliaannya. (Lagi yang terpelihara dengan sebaik-baiknya) di Lauh Mahfuz." (al-Buruj 85: 21-22)

Penurunan **Peringkat Kedua**: Turunnya al-Quran dari Lauh Mahfuz ke Bait al-'Izzah di langit dunia. Ini berdasarkan beberapa firman Allah yang bermaksud, "*(Masa yang diwajibkan kamu berpuasa itu ialah) bulan Ramadan yang padanya diturunkan al-Quran, menjadi petunjuk bagi sekalian manusia dan menjadi keterangan-keterangan yang menjelaskan petunjuk dan (menjelaskan) perbezaan antara yang benar dengan yang salah...*" (al-Baqarah 2: 185) Firman Allah yang bermaksud, "*Sesungguhnya Kami telah menurunkan al-Quran itu pada malam yang berkat; (Kami berbuat demikian) kerana sesungguhnya Kami sentiasa memberi peringatan dan amaran (jangan hamba-hamba Kami ditimpa azab).*" (al-Dukhan 44: 3) Firman Allah yang bermaksud, "*menurunkan (al-Quran) ini pada malam al-Qadar.*" (al-Qadr 97: 1).

Penurunan **Peringkat Ketiga**: iaitu peringkat terakhir di mana sampainya al-Quran ke alam ini melalui perantaraan malaikat Jibril AS kepada Nabi Muhammad SAW di Gua Hira, Mekah dengan perintah membaca surah al-'Alaq ayat pertama hingga kelima.

Penurunan al-Quran secara berperingkat ini dicatat pada lembaran-lembaran pelepah tamar, kulit, tulang belulang yang dihafaz oleh para sahabat Nabi SAW. Para sahabat juga akan membaca ayat-ayat al-Quran di hadapan Nabi SAW bagi memastikan tiada kesalahan dalam ingatan dan catatan mereka. Al-Quran diseragamkan dalam satu mushaf semasa era pemerintahan Khalifah Uthman bin Affan RA sekitar tahun 650 Masihi.

Al-Quran merupakan mukjizat yang sangat agung. Kandungannya meliputi segenap cabang ilmu. Terdapat di dalam al-Quran fakta-fakta saintifik yang jika dilihat dan dikaji akan menambah keimanan dan keyakinan setiap muslim. Antaranya ialah tentang pembentukan alam semesta yang asalnya daripada satu bentuk kemudian dipecahkan bentuk tersebut sehingga membentuk alam semesta. Firman Allah bermaksud, "*langit dan bumi, keduanya bertaut (bersatu), lalu Kami belahkan keduanya? Kami jadikan setiap sesuatu yang hidup dari air, tidakkah kamu percaya?*" (al-Anbiya 21:31).

Selain itu di dalam al-Quran juga menyatakan secara terperinci tentang perkembangan janin di dalam kandungan yang mana ianya tidak diketahui pada zaman dahulu tetapi hanya dapat diketahui saintis pada zaman moden kini.

Al-Quran juga bukan sahaja diturunkan kepada umat manusia, sebaliknya ia turut disampaikan kepada makhluk daripada kalangan jin. Firman Allah bermaksud, "*Katakanlah (wahai Muhammad): Telah diwahyukan kepadaku, bahawa sesungguhnya: satu rombongan jin telah mendengar (al-Quran yang aku bacakan), lalu mereka (menyampaikan hal itu kepada kaumnya dengan) berkata: "Sesungguhnya kami telah mendengar al-Quran (sebuah kitab suci) yang susunannya dan kandungannya sungguh menakjubkan!"*" (al-Jinn 72:1)

Kesimpulannya, al-Quran adalah anugerah teragung yang Allah kurniakan kepada seluruh umat manusia. Sewajarnya umat Islam sentiasa menyibukkan diri dengan membaca, mendalami dan memahami isi kandungan al-Quran. Selain itu, segala ajaran yang terkandung di dalam al-Quran seharusnya diamalkan agar kehidupan manusia tidak terjerumus ke lembah kerosakan. Jadikanlah bulan Ramadan pada kali ini sebagai pencetus kepada kita mencintai al-Quran.